

摘藻堂四庫全書薈要

集部

欽定四庫全書薈要卷一萬六千三百五十

集部

道園學古錄卷二十三

應制錄三

元 虞集 撰

碑

武衛新建先聖廟學碑

國家初建大都迺分侍衛親軍為列衛布諸畿內武衛其一也至元廿六年始置營在涿州南去京師二百里凡衛必有營營有城郭樓堞門障關禁官治行伍廬舍

庫廩衢巷市井而特立先聖孔子之廟儒學在焉衛之
官有都副指揮使以下將帥偏裨什伯之長委積營作
之署幕府文書之史而特設儒學教授以教士大夫子
弟焉衛士以萬計自非征行則有內府修繕之役歲巡
幸則以精銳從其留屯於營者三之一其使之長率以
近臣領之其官治京師中而分任屯事於營者使或副
若貳皆三歲一更將吏亦各以番上獨教授常在衛治
教事此衛有學官之大槩也天歷二年武衛都指揮使

洪灝分衛事治營中迺曰今聖天子聰明睿知文治彙
興天下莫不嚮風而興起灝也世慎忠孝得備戎行少
游上庠得受教於君子矣而吾衛廟學未立師弟子數
學無所於在非闕典歟此誠灝之責也時揚阿方為衛
使之長深然其言即以建學之事上聞上可之迺以軍
務之暇度地於營東南廣袤八十畝迺基迺堂於其燥
剛觀泉審方作新文明經營材用石木陶冶工作程度
心畫指授具有成法明年知樞密院庫庫台來代揚阿

見諸侍之足備欣然相成之即日復以興役聞於是經
始於至順辛未之三月作禮殿以奉先聖像顏子曾子子
思孟子配從祀十哲分位殿中東西鄉七十二弟子繪
廡下作講堂齋廬庖廩垣墉門衛皆如常制凡費用一
出公帑不以煩人及冬而告成是年中書平章政事阿
爾哈雅公以宰相兼長衛帥隆然舊臣敦詩書禮樂以
佐天子之治教尤樂其有成為度營旁地得二千畝俾
耕以食學者乃以廟學告成入請於上命臣集記之臣

集受詔謹具其事迺再拜稽首而言曰昔我太祖皇帝
奮揚天威爰啓帝祚世祖皇帝神武不殺遂一海內列
聖相承功成治定至於今上皇帝天下晏然兵措不用
爪牙之士迺得優游絃歌於其間豈非千載之盛乎臣
嘗學於孟軻氏矣其言以為未有仁而遺其親未有義
而後其君者也又以為壯者暇日修其孝悌忠信則雖
制挺可以勝敵蓋言人心天理之足恃也如此今學校
之設其教則仁義之道也其事則孝弟忠信之行也誠

使剛強武勇之士身衽金革而知學焉則仁義素明於
胷中忠信不遺於平日緩急有所用焉知義利之辨得
違順之決識定志堅見危致命以親上死長則立功國
家名顯後世復何疑焉然則學校之設豈小補哉敢作
詩以頌之其辭曰

皇命建學制自都邑通祀先聖中外惟則周廬列藩環
拱中極率是有作以造成德維時武衛載度新宮其帥
有文以為已功衆勸其來有敏其功相臣冠軍曰宜有

崇既崇既完入告天子天子曰咨我旅多士戢爾干戈
妥爾鞭弭俎豆游歌庶其在此侃侃將帥而父而兄勉
爾孝友勗爾忠貞出奮於征歸力於田輯睦靖恭勿怠
勿爭有牲有醴歲時用享觀德於射我祀爾相端爾威
儀節爾飲讓神之格思錫爾多慶崇墉言言過者式之
有仇其門來者則之麗牲之石史有刻辭永志勿忘君
子之思

黃錄普度大醮功德碑

泰定二年歲次乙丑正月之吉始和皇帝燕居穆清撫
時康寧中心無為以守至正踐丕承之位著若有見於
羹牆乃召集賢院臣而告之曰惟天惟祖宗委祉錫禧
式克至於今日海嶽寧謐波塵不驚詩曰於乎皇王繼
序思不忘予曷敢弗顧諟乎宗廟烝嘗之事有司具矣
然而雲蒸霧滃予何以見其升降天回日旋予何以識
其往來有能為予專志意以通神明者乎昔在成廟受
遺世皇睠惟儷極之賢克相內理然而蒼梧弗從降靈

小水遺恨徒結歲月云邁且夫本支繁茂豈無孽芽之
傷雲漢昭回慙有氛祲之掩觸念毫髮疾心丘山有能
為予釋隱憂而滌靈爽者乎夫有天下也一體民物一
視宇宙庶蒿悽愴予猶有慨於神明幽沈抑塞詎謂可
忘於臣庶有能為予發晶耀而溥惠渥者乎皆頓首言
曰聖慮淵微非臣愚所敢與知天人之間其事甚重非
臣所得專任請與丞相議之制曰可明日入奏曰道家
有黃籙齋科者上可以導列聖之宸游下可以達羣生

於屯昧請以是昭塞旨意之萬一皇帝若曰俞哉庶其
在茲乎時則有若三十九代天師太玄輔化體仁應道
大真人臣張嗣成親揚祖教妙幹道樞神仙演道大宗
師泰定虛白文逸明德真人臣孫履道以老成敦厚之
資深符真契特進上卿玄教大宗師崇文弘道玄德廣
化真人臣吳全節以聰明特達之器參贊化機並領玄
宗共承明詔以二月一日各真人率南北道士十衆即
大長春宮陳大科法者七日出黃籙白簡萬通啟長夜

之幽局暢好生之至德於是祠曹總禮神之儀物詞臣具冊祝之文章宣徽陳禮饌以惟共內府發金繒而弗吝揖拜跪起皆西清禁近之英奉若對揚必黃閣臣鄰之重有司咸在百辟駿奔丕休哉在天之靈莫不顧歆於上溥天之澤莫不均被於下赫赫洋洋洞洞煌煌一時盛典蔑有加焉於是陳玄功於翰墨留芳迹於庭除禮也謹按故事昔憲宗皇帝甲寅之歲以建國之初方事兵革鋒鏑之下或致大傷乃紆皇心常有斯舉於今

七十有一年矣時和歲豐民安物阜曾無昔日之虞而
舉今茲之祀者何哉蓋嘗思之聖人之心常兢兢於方
盛之時不逸豫於未央之日用能保鴻圖於永固御景
福於方來者此其故與嗚呼盛矣乃頌之以詩曰

於穆聖皇宅心至神何幽不燭何枯不春百度具張羣
公在位曰此人事未究玄懿至人通神出陽入陰以成
天工實契我心長春之宮密邇帝所極爾禘儀勿制常
數飛章列符萬神並來奔走後先昭假匪私吁嗟典祀

國有常制犧牲粢盛既充既旨陟降在庭孰是孔昭風
馬雲車於馬會朝德音布宣洪恩斯沛惟爾有生是錫
是賚下沈九泉誰復念之今振而興俾承生基茫茫八
埏同戴咸喜向陽就明萬億及秭域中四大匪異伊同
聽我詠歌以贊皇風

東嶽仁聖宮碑

延祐中故開府儀同三司上卿玄教大宗師張留孫買
地於大都齊化門外規以為宮奉祠東嶽天齊仁聖帝

仁宗皇帝聞之給以大農之財辭不拜第降詔書護作

方鳩工而留孫歿後

闕

年今特進上卿玄教大宗師吳

全節大發累朝賜金以成其先師之志至治壬戌作大

殿作大門殿以祀大生帝前作露臺以設樂門有衛神

明年作東西廡東西廡之間特起如殿者四以奉其佐

神之尊貴者列廡如官舍各有職掌皆肖人而位之築

館於東以居奉祠之士總名之曰東嶽仁聖宮泰定乙

丑魯國大長公主自京師歸其食邑之全寧道出東門

有禱於大生帝出私錢鉅萬俾作神寢象帝與其妃夫
人嫗寺之容天歷建元今上皇帝即大位遣使迎大長
公主於全寧還及國門皇后迎母於郊主禮神拜貺而
後即其邸天子乃賜神寢名曰昭德殿云宮廣深若干
畝為屋若干楹高大弘麗足以久遠歲時內廷出香幣
致祭都人有禱祈咸得至焉有勅命臣集撰文勒諸麗
牲之碑其辭曰

帝奠九土辨方秩祀封嶽維五咸在天子有嚴岱宗望

之東郊雨雲來敷曾不崇朝有壇有宮神師攸作蒼龍
青旂百靈祇若天子神聖惠於民人睠言度思昭德維
新丹楹朱戶納陛登陟青青五組蕪幣加璧禮有舉之
祇益以因即祠不違天子之仁徂徠有原新甫有隰樂
具在廷遠於來輯庖盈大享寢陳燕詩神具樂康以惠
我私春日載陽帝藉于耜以先農人祈我穡事我觀我
稼視邇知遠爾煦爾澤自我畿甸相彼柔桑被於沃饒
相彼玄鳥亦集其條濺濺流水駕言來被受弓載韜思

皇朱芾出其閨閣士女車徒來尸來宗壽天在予佑我
民庶克修孝弟以養以賦以受多祉兵祲弗驚舊癘弗
嬰熙熙有生以樂治平天子萬年成功則告刻文登封
則有貞玉

大都城隍廟碑

世祖聖德神功文武皇帝至元四年歲在丁卯以正月
丁未之吉始城大都立朝廷宗廟社稷官府庫廩以居
兆民辨方正位井井有序以為孫子萬世帝王之業七

年太保臣劉秉忠大都留守臣都沁侍儀奉御臣呼圖克
約蘇禮部侍郎臣趙秉溫言大都城既成宜有明神主
之請立城隍神廟上然之命擇地建廟如其言得吉兆
於城西南隅建城隍之廟設象而祠之封曰祐聖王以
道士段志祥築宮其旁世守護之自內廷至於百官庶
人水旱疾疫之禱莫不宗禮之爾來六十有餘年國家
治平民物繁阜日盛一日而神之所依亦厚矣祀典之
載所謂有其舉之而莫之敢廢者歟乃天歷二年二月

庚子皇后遣內侍傳旨中政院臣使言於上曰城隍神廟世祖皇帝時所建有禱必應烜赫彰著而廟久弊弗葺無以答神明之貺以繼世祖之意請出內帑寶鈔五萬緡以修制曰可命京尹臣賈某董之太史以諏日弗協請俟其吉九月中書參知政事臣趙世安等奉勅封神曰護國保寧祐聖王其配曰護國保寧祐聖王妃至順二年二月癸亥以前所賜為未足用增賜寶鈔十萬緡大修治之平章政事臣阿爾哈雅工部尚書臣伊滿

和爾實奉詔領其事且命之曰庀工而有餘資則以賜
諸廟中給恒用於是工部率其屬以即役土木瓦石金
碧丹堊既善既足百工並作無敢不虔未幾而告功於
是有勅史臣集製文刻石以垂示無窮臣集拜手稽首
而言曰聖上受命自天纂承大統師武臣力著功盟府
百靈相協固其宜哉聖后輔佐聖明之成功而一神之
報亦不敢忘可以觀德可以致福可以示勸於臣矣於
戲盛哉請系以詩曰

維皇建國宅中圖大臨制萬方式表無外列雉四周壯
於天垣爰立明神以保固完司空奉詔慎擇吉土作廟
坤維以祝休嘏相維典則有社有方群黎萬姓罔敢褻
褻維神孔邇有堂有寢曰豫則康威怒斯凜歲時牲牢
旨酒明粢無有小大士女畢來列聖清明歲行六十風
氣宣通民物豐殖相爾檐角丹堊弗新何以妥之俾佑
我人皇上至仁思保赤子聖后念之命禱靈時天高日
明風塵不驚大開明堂治功告成有祈有報伊古之道

出財官府撤弊改橈山藻孔文既間既安度其王封載
加彌尊神來燕喜百和萃止導天之貺為國之祉室家
祚胤福祿萬年貽及於民生養弗愆崇墉嚴嚴太止之
固神永有依斯皇多祐

句容郡王世績碑

國家治平之業所以奠安而久固者禮樂刑政一本於
朝廷而執干戈以衛社稷於四境之外者則亦必有桓
毅過人之勇直亮不回之節以兼爪牙腹心之任而又

世世祖父子孫相承一志然後可以內為天子之所信
倚外為彊敵之所懾服故處常則有不可犯之勢遭變
則建非常之功嗚呼其所關係豈輕也哉天厯元年皇
帝撥亂反正以太平王右丞相雅克特穆爾有建謀力
戰之功思其祖父之績乃敕使臣製文紀事勒諸貞石
以示不朽焉謹按欽察之先武平北折連川按塔哈山
部族也後遷西北即裕勒伯里之山居焉土風剛悍其
人勇而善戰有奇納者乃號其國曰欽察為主而統

之奇納生蘇穆鼐蘇穆鼐生伊納克實太祖皇帝征茂
齊蘇呼都克呼都克奔伊納克實遣使諭取之弗從及我
師西征伊納克實老不能理其國歲丁酉伊納克實之子
孫和拉蘇默自歸於太宗而憲宗受命帥師已及其國和
拉蘇默之子孺都徹爾舉族來歸從討茂齊蘇有功世祖皇
帝西征大理南取宋其種人以強勇見信用掌芻牧之事奉
馬漣以供玉食馬漣尚黑者國人謂黑為哈喇故別號其人
哈喇齊日見親近妻以哈納郡王之女弟紐倫中統初元

討阿哩克布克之亂殯都徹爾與其子圖圖爾哈皆有
功殯都徹爾卒圖圖爾哈領其父事是為句容郡武毅
王海都之叛皇子北平王帥諸王之師鎮祖宗龍興之
故地至元十四年叛王托克托穆爾錫里濟入寇諸部
曲見掠先朝大武帳亡焉圖圖爾哈王憤之誓請決戰
三月敗其將都哩濟延於納琳布拉克以所掠諸部還
四月珠爾噶岱構亂應昌托克托穆爾以兵應之與我
軍遇將決戰先得其斥候數十托克托穆爾懼而引去

遂滅珠爾噶岱六月逐大兵於圖喇河八月又敗之琿
歡河得所亡大帳還諸部之衆於北平我師北伐詔欽察驍
騎千人以從十五年正月追錫里濟踰金山擒扎哈台以獻
又敗衮齊格等軍俘獲甚衆冬入朝召至榻前親慰勞之賜
以白金百兩金壺盤盂各一白金甕一椀十金織衣段九海
東白鶻一國家侍內晏者每宴必各有衣冠其制如一謂之
濟蘇悉以賜之且有詔曰祖宗武帳非人臣所得御卿能歸
之故以與卿軍中宴諸帥則設之欽察人為民戶及隸諸王

者別籍之戶給鈔二千貫歲給粟帛擇其材者備禁衛十
九年拜昭勇大將軍同知太僕院事明年改同知衛尉院
事領羣牧司事給霸州文安縣田四百頃命哈喇齊屯田
益以亡宋新附軍八百二十一年賜金虎符以河南等路
蒙古軍子弟四千六百隸之又賜尚方金貂裘帽玉帶青
鶻近郊田二千畝水磴一區二十二年拜鎮國上將軍樞
密副使二十三年置欽察衛遂兼其親軍都指揮使聽以
族人將吏備官屬六月海都兵入寇奉詔與大將達勒達

哈禦之二十四年諸王納延叛於東藩陰遣使來結額布根實喇罕王獲謀者得其情密以聞諸朝請召實喇罕以離之他日實喇罕為宴會邀二大將達勒達哈將往王曰事不可測遂不往實喇罕計不得行未幾有詔召實喇罕王曰此東藩之人由東道是其欲也將不可制言於北安王命之西行或言額布根將反者軍吏請奏而圖之王曰不可緩也身為先驅引大兵以前窮晝夜之力渡圖喇河與額布根戰大敗之世祖方親征聞詔王沿河而行盡

收其餘黨以還道遇伊特格勒其軍萬騎擊走之大
獲納延畜牧俘叛王哈喇婁等獻之喀爾欽察之人
先隸諸叛王者悉來歸置哈喇婁萬戶府是歲王子
成格勒奉詔從太師裕勒魯在軍戰於百塔山有功
拜昭勇大將軍左衛親軍都指揮使武金虎符出則
被堅執銳以率虎羆之士入則操刀匕以事割烹執
鬯杓以進漣飲親幸委任已見於當時成宗方撫軍
詔以王從十一月征納延餘黨於哈喇誅烏達哈盡

降其衆二十五年伊濟呼王為叛王和爾郭斯所攻甚急五月王從成宗移師援之敗諸烏爾瑚還至哈拉衮山夜渡格勒爾河敗叛王哈丹之軍盡得遼左諸部置東路萬戶府以鎮之伊濟呼有女弟塔倫遂以妻王二十六年海都犯金山抵抗海嶺皇孫晉王帥兵禦之敵先據險我師不利王獨以其軍陷陣入戰翼晉王出明日追騎大至王伏兵殿之七月世祖親巡北邊召見王而慰之曰昔太祖與其臣之同患難者飲

班珠爾河之水以記功今日之事何愧昔人卿其勉之
海都等戰既數敗又知上親征遂引兵去車駕還都大
宴上謂王曰朔方人來聞海都言戰者人人如圖圖爾哈
吾屬何所容身哉論功行賞先欽察之士以建康廬饒
舊籍租戶千為哈喇沁戶又以俘獲之戶千七百賜之官
一子以督賦而成格勒在宿衛亦帥其軍扈從至於和
林額伯蘇之山拜昭武大將軍欽察親軍都指揮使左
衛親軍都指揮使兼太僕少卿二十八年王奏哈喇沁

之軍數已盈萬足以備用詔賜珠帽珠衣玉帶金帶名
鵲細毳縑素萬匹帥其人北獵堪達罕邊寇聞之不敢
動二十九年掠地金山虜海都之戶三千有詔進取齊
蘇濟蘇明年次欠河水行數日盡收其衆留兵鎮之奏
功拜龍虎衛上將軍賜行樞密院印海都聞之領兵至
欠河又敗之擒其將巴哩察成宗皇帝即位詔之曰邊
事重其免會朝賜白金五百兩七寶金酒器白毳帳鈔
萬緡獨峯馳五冬召入朝有加賜則賜其軍士鈔一千

二百萬元貞元年春還守北邊二年秋諸王從海都者
皆來降邊民驚動王帥兵金山之伊囉勒罕備之資饋畢
給民用不擾親導伊瑪呼等王以朝上解御衣以賜又
賜黃金百兩白金千五百兩鈔五萬輜輿各一大德元
年拜銀青榮祿大夫上柱國同知樞密院事欽察親軍
都指揮使如故還邊二月至宣德府薨年六十一是年
有詔成格勒世其父官領北征諸軍後亦封句容郡王
王帥師踰金山攻巴林之地八隣之南有大河曰達嚕

噶其將托里台阻水而軍伐木柵岸以自庇士皆下馬
跪坐以待我軍矢不能及馬不可進王即命吹銅角舉
軍大呼聲振林野坐士不知所為爭起就馬王麾軍畢
渡湧水泊岸木柵漂散因奮師馳擊五十里而後止盡
得其人馬廬帳還次阿魯河與博貝巴圖之軍相遇博
貝巴圖者海都所遣援巴林者也阿魯之上有山甚高
博貝陣焉山高駿馬不利於下馳急麾軍渡河蹙之博
貝馬下坂多顛躓急擊敗之追奔三十餘里博貝僅以

身免二年北邊諸王都勒幹徹徹圖等潛師急至襲我
和羅海圖之地和羅海圖亦有山甚高其師來據之王選勇
而能步者持挺刃四面上奮擊盡覆其軍斂遁者無幾
三年入朝上解衣賜之慰勞優渥拜鎮國上將軍僉樞
密院事欽察親軍都指揮使左衛親軍都指揮使太僕
少卿還邊是時武宗在潛邸領軍朔方軍事必諮於王
及戰王常為先付托甚重四年秋畔王圖們烏羅斯等
犯邊王迎敵於庫克之地及其未陣王以其軍直揮之

敵不能支逐之踰金山乃還五年海都之兵又越金山而南止於特濟根山因高以自保王以其軍馳當之既得平原地便於戰乃并力攻之敵又敗績都勒韓之兵西至與大軍相撓於烏爾圖之地王又獨以其精銳馳入其陣戈甲戛擊塵血飛濺轉旋三周所殺不可勝計而都勒韓之兵幾盡武皇親見之曰力戰未有如此者事聞上使御史大夫圖吉知樞密院事塔喇海伊克扎爾固齊圖固勒即齊訥實之地聚諸王軍將問戰勝功狀

於是親王以下至於諸軍咸以為王功第一無異辭於
是安西王與王衣一鶻一騾二十晉王與王衣一金椀
二獨峯駝四而武皇命王尚雅克圖楚王公主察球爾
賞以尚衣貂裘使者以功簿奏上出御衣遣使臨賜之
詔曰邊圉事重少留鎮之七年秋入朝上親諭之曰自
卿在邊累建大功事績昭著周飾卿身以兼金猶不足
以盡朕意遂賜御衣一帽一玉頂笠一盤珠金衣一履
雙珠三囊黃金百兩白金五百兩鈔十萬貫鶻一拜騾

騎衛上將軍樞密副使欽察親軍都指揮使左衛親軍都指揮使太僕少卿賜其親軍萬人鈔四十萬貫九年都勒幹徹伯爾明埒特穆爾等諸王相聚而謀曰昔太祖艱難以成帝業奄有天下我子孫乃弗克靖以安享其成連年動兵以相殘殺是自傷祖宗之業也今撫軍鎮邊者吾世祖之嫡孫也吾與誰家爭哉且前與圖圖爾哈戰既累不勝今與其子成格勒戰又無一功惟天惟祖宗意可見矣不若遣使請命罷兵通一家之好使吾士

女老者得其養少者得其長傷殘疲憊者得其休息焉
則亦無負太祖之所望於子孫者矣使至上深然之於
是明埒特穆爾等罷兵入朝特為置驛以通往來十年
拜榮祿大夫同知樞密院事尋拜光祿大夫知樞密院
事欽察左衛指揮太僕少卿皆如故從武皇於呼瑪奇
之海上成宗崩訃至入告武皇曰殿下親世祖之嫡孫
以先帝之命居祖宗之故地以鎮撫朔方者且十餘年
矣海都訥木歡見明埒特穆爾自世祖時各為叛亂今

皆來歸前後叛亡俘虜悉復其舊皆殿下之威靈也臣
先父圖爾哈受知世祖恩深義重臣之種人強勇精銳
臣父子用之無戰不克殿下急宜歸定大業以副天下
之望臣請率其衆備驂乘之士武皇納其說即日南邁
以裕宗皇帝舊服玉花衣賜之副以玉帶一寶珠一海
東白鶻一常御幄殿一服用之具咸備行至和林又賜
鈔五萬貫衣段百五月達上都武宗皇帝即位賜王尚
服七寶笠一大寶珠衣一盤珠衣一黃金五百兩白金

五千兩鈔二十五萬貫先帝所御大武帳一豹一加賜
公主珍寶尤厚秋拜平章政事仍兼樞密欽察左衛太
僕還邊冬加封榮國公授銀印出制辭以命之復有尚
服衣段虎豹之賜中宮加賚於公主者亦俱至焉至大
元年遣使賜金衣三十對衣千二年入朝封句容郡王
賜金印玉手印一七寶笠一珠帽一七寶帶一玉帶一
七寶束帶一黃金二百五十兩白金一千五百兩鈔一
萬貫鵲四豹二上曰世祖征大理時所御武帳及所服

珠寶之衣今以賜卿其勿辭翌日又以世祖所乘安輿
賜王上曰以卿有足疾故賜此王叩頭泣涕固辭而言
曰世祖所御之帳所服之衣固亦非臣所敢當而乘輿
尤非所宜蒙也貪寵過當臣實不敢上顧左右曰他人
不知辭此別命有司置馬轎賜之俾得乘至殿門下仁
宗在東宮有衣帽金寶之賜太后又有加賜還邊仁宗
皇帝即位入朝賜尚服衣一襲金束帶一黃金百兩白
金千兩鈔五十萬金對衣三十金玉馬鞍一太后加賜

夏衣二十鈔一十萬氊帳一穹廬十特授光祿大夫平
章政事知樞密院事欽察親軍都指揮使太僕少卿延
祐元年額森布哈等諸王復叛伊德哈雅默色之地王方
接戰有敵將一人以戟入陣刺王者王擗其戟揮大斧
碎其首血髓淋漓殞於馬首乘勢奮擊大破之遣使入
報有尚服之賜二年與額森布哈之將額布根呼圖克
特穆爾戰齊默根之地轉殺周匝追出其境鐵門關秋
又敗其大軍於齊爾之地上聞之遣使賜勞有加四年

上念王之功而憫其老也召之命商議中書省事知樞
密院事大理國進象牙金飾轎即以賜王每見必賜坐
上食必賜食待之以宗室親王之禮王常曰老臣受朝
廷之賜厚矣吾子孫不以死報國可乎至治二年薨年
六十三臣聞古之言將者曰謀與勇惟王父子沉機大
略固不可測而其軍堅悍慄疾有所攻戰應聲而起神
變倏忽奮無迴顧智者不暇慮勇者不及舉而已敗衄
無餘矣此其所以致勝也而又數世之傳一軍之士同

稟忠義而不變同赴患難而不辭此其成大功享大名
而膺國家之深信異寵者歟謹按王世家和拉蘇默贈
推忠効順功臣金紫光祿大夫大司徒柱國句容郡王
謚剛毅妻特古格句容郡王夫人璵都徹爾贈推誠宣
力保義功臣太尉開府儀同三司上柱國句容郡王謚
忠定妻圖魯齊句容郡王夫人圖圖爾哈贈宣忠定遠
佐運功臣太尉開府儀同三司句容郡王謚武毅妻曰
塔塔爾扎實琳沁也曰烏邁巴勒沁也曰囊嘉特章翁

吉喇特珍也曰額必倫翁吉喇特珍也曰塔掄也伊濟
呼王女弟也皆封句容郡王夫人子八人長曰塔齊爾
定遠大將軍北庭元帥次曰台哈布哈御位下博囉齊
三曰成格勒四曰巴爾布哈武略將軍欽察親軍千戶
五曰特穆爾布哈武德將軍管領建康廬饒等處圖圖
爾哈并哈喇齊戶計達嚕噶齊六曰呼爾察武略將軍
欽察親軍千戶七曰伊埒特穆爾武德將軍僉武衛親
軍都指揮使兼大都屯田事八曰多固爾班昭勇大將軍

欽察親軍都指揮使女五人曰克楚巴爾曰旺扎勒台曰
多爾濟曰紐掄曰某成格勒之妻察濟公主楚王女也曰
額森特爾克塔塔爾珍也曰額森呼圖克都哩宗室伊濟
呼女弟曰哈勒津塔塔爾珍也子七人長曰碩裕實布哈
官武略將軍欽察親軍千戶蚤卒次曰雅奇布哈資德大
夫大司農卿三曰雅克特穆爾太平王達爾罕右丞相四
曰薩敦榮祿大夫宣徽院使五曰雅克都噶爾闡遺少監
蚤卒六曰塔里

闕

國公七曰巴爾丕勒汗幼卒女四人長

曰蒙克格爾適實達爾駙馬弟台呼都哩次曰旺扎勒台
適僧格巴勒王三曰納扎該適實喇卜多爾濟王四曰伊
埒塔實適阿勒呼木特穆爾王臣拜手稽首而作銘曰

維皇太祖受天明命龍旗建旂神旅用振雲雷險屯盤桓奮
興邇伐遠攻羣方畏懲既定大業以遺孫子分地有疆羅絡
森峙維支之彊宗于本根孰披則離孰固以存赫赫世祖大
集厥成天覆日臨無往不庭顧茲臣庶嚮屬無外天未悔禍
屬近而悖挺為暴強弄兵嬉狂弗念弗懷勞我父兄我無藏

怒往正迷德維時虎臣無禦不克虎臣維何欽察世家

克長克君為國爪牙相厥種人均勇同悍爾蒐爾帥累
百盈萬牧則善芻飲漣孔腴衽金以居鳴箭以趨鳴箭
咽咽壯士心折卷甲齊驅千憤一呌孰為叛夫子旅于
廬王先伐謀隨以勦屠勿敢寧止不虞奄至潰不暇奔
沉及闕死父子百戰從於宗藩或拔或援我圉永完天
不與畔思禍知悔力困於外心服於內來言來歸矢辭
大同洒濯拜稽以朝成宗王護其來徒御不驚肅肅邊人

同我太平桓桓武皇實善將將定策驂乘王猷用壯紀
功則隆論賞則豐帝胄作嬪五世王封世忠世勇列聖
所使千載之傳國有信史句容之墟接於太平今王之
疆天子所營其功非常報亦殊特勒勲北郊昭示萬國

道園學古錄卷二十三

謹案卷二十二第二頁前三行雅克特穆爾舊作

燕帖木兒今改

五頁後五行特克哩舊作鐵理

今改

六頁前四行哈克繖舊作哈散今改

後四行雅克布琳舊作燕卜鄰

又明埒舊作

明里今並改後仿此

八頁後七行烏括堅巴

舊作悟理間八今改後仿此

九頁前五頁戩

藏布舊作鑑贊八今改後仿此 十一頁後三行

額琳特穆爾舊作阿璘帖木兒今改 十三頁

前八行和斯輝舊作忽思慧今改 十四頁後
三行薩勒迪舊作撒迪今改後仿此 後四行
鴻和爾布哈舊作晃忽兒不花今改後仿此
二十頁後六行塔齊爾舊作塔察兒今改後仿
此 二十三頁前三行巴拉實哩舊作不刺失
利今改後仿此

卷二十三第二頁前四行揚阿舊作亞安今改後
仿此 九頁後一行都沁舊作殳貞今改 後

二行呼圖克約蘇舊作忽都于思今改後仿此

十頁前八行伊滿和爾舊作宕穆忽爾今改

後仿此 十二頁前六行按塔哈舊作按答罕

今改 前七行裕勒巴里舊作玉黎北里今改

前八行奇納舊作曲年今改後仿此 後一

行蘇穆鵠舊作唆末納又伊納克實舊作亦納

思又茂齊蘇舊作蔑乞思又呼都克舊作火都

今並改後仿此 後四行和拉蘇默舊作忽魯

速蠻今改後仿此 後五行璵都徹爾舊作班

都察今改後仿此 後八行哈喇齊舊作哈刺

赤又紐掄舊作訥論今並改後仿此 十三頁

前一行阿哩克布克舊作阿里卜哥又圖圖爾

哈舊作土土哈今並改後仿此 前四行托克

托穆爾舊作脫脫木又錫里濟舊作失列吉今

並改後仿此 前五行都哩濟延舊作朶兒赤

延今改 前六行納琳布拉克舊作納蘭不刺

又珠爾噶岱舊作只兒瓦鰓今並改後仿此

後三行扎哈台舊作扎忽台又袞齊格舊作寬

赤哥今並改 十四頁後一行達勒達哈舊作

朶兒朶懷今改後仿此 後二行實喇罕舊作

勝刺哈今改後仿此 十五頁前一行伊特格

勒舊作也鐵哥今改 前二行哈喇婁舊作哈

兒魯又喀爾舊作康里今並改後仿此 前四

行成格勒舊作創兀兒又裕勒魯舊作月兒律

今並改後仿此

前八行烏達哈舊作兀達海

又伊濟呼舊作也只里今並改後仿此 後二

行烏爾瑚舊作兀魯灰今改 後三行哈拉衮

舊作哈刺溫又格呼爾舊作貴列今並改 十

六頁前一行班珠爾舊作班木今改後仿此

前七行額伯蘇舊作兀卑思今改 後二行堪

達罕舊作漢塔海今改 後四行齊蘇濟蘇舊

作乞思吉思今改 後六行巴哩察舊作孛羅

察今改 十七頁前二行伊囉勒罕舊作玉龍
海今改 前三行伊瑪呼舊作岳木忽今改
前八行巴林舊作八鄰今改後仿此 後一行
達嚕噶舊作答魯忽又托里台舊作帖良臺今
改 後五行阿嚕舊作阿雷又博貝巴圖舊作
孛伯拔都今並改後仿此 十八頁前一行都
勒幹舊作都哇又徹徹圖舊作徹徹禿今改 前
二行和囉海圖舊作火兒哈禿今改 前七行

圖們舊作禿麥又烏魯斯舊作幹魯思今並改

前八行庫克舊作濶客今改 後二行特濟

根舊作鐵堅古今改 後四行烏爾圖舊作兀兒

禿今改 後七行圖吉舊作禿只又塔喇海舊

作塔刺海今並改 後八行圖固勒舊作禿忽

魯又齊訥實舊作赤納思今並改 十九頁前

三行雅克圖舊作雅忽禿又察球爾舊作察吉

兒今並改 後三行徹伯爾舊作察八兒今改

二十頁前五行呼瑪奇舊作渾麻出今改 前

八行諾木歡舊作納木忽今改 二十二頁前

三行伊德哈雅默色舊作亦忒海迷失今改

前七行齊默根舊作赤麥干今改 前八行齋

爾舊作扎亦兒今改 二十三頁前四行特古

格舊作帖古該今改 前六行圖嚕齊舊作禿

倫察今改 前七行塔塔爾扎寶琳沁舊作太

塔你扎只刺真今改 前八行烏邁巴勒沁舊

作兀買八里真又囊嘉特章舊作曩加真今並

改後仿此 後一行額必倫舊作阿八倫今改

後三行台哈布哈舊作太不花又博囉齊舊

作博兒赤今並改後仿此 後四行巴爾布哈

舊作別里不花今改 後六行呼爾察舊作歡差今


改 後七行伊埒特穆爾舊作岳里帖木兒今

改 後八行多固爾班舊作斷固魯班今改

二十四頁前一行克楚巴爾舊作曲出伯今改

前二行察濟舊作察吉又額森特爾舊作也先
帖你又塔塔爾珍舊作塔塔兒真今並改後仿
此 前三行額森呼圖克都哩舊作也先忽都
都魯又哈勒津舊作哈刺真今並改 前四行
碩裕實布哈舊作小雲石不花今改 前六行
薩敦舊作撒敦今改後仿此 前七行雅克都
噶爾舊作燕禿哈兒又巴爾丕勒汗舊作潑皮罕
今改 後一行蒙克格爾舊作忙哥合又實達

爾舊作失禿兒今並改 後一行台呼都哩舊
作太忽突魯又僧格巴勒舊作相哥八刺今並
改 後二行納扎該舊作納只罕又實喇卜多
爾濟舊作沙藍朶兒只又伊埒塔納舊作月魯
帖你今並改



總校官庶吉士臣張能照

校對官檢討臣龔大萬

謄錄監生臣樊少巨

欽定四庫全書薈要

集部

道園學古錄卷二十四



詳校官助教臣謝登雋

欽定四庫全書薈要卷一萬六千三百五十一

集部

道園學古錄卷二十四

應制錄四

元 虞集 撰


曹南王世德碑

中書右丞相臣雅克特穆爾等言陛下入正大統道汴梁
命山東河北蒙古軍都萬戶府都萬戶伊蘓岱爾以其
兵從至京師以功拜河南等處行中書省平章政事於

法官一品當贈三代官封伊蘓岱爾曾大父博綽大父
伊埒根父阿婁罕嘗為大將戰功多又皆死王事軍中
宜追封以第一等爵制曰可有司以詔書議贈所當得
官按地定封於是故贈定威佐運功臣榮祿大夫司徒
上柱國曹國公謚忠定博綽加贈定威佐運功臣光祿
大夫司徒上柱國追封曹南王謚如故故蒙古漢軍都
元帥贈宣忠靖遠功臣光祿大夫中書右丞相上柱國
曹國公伊埒根加贈宣忠靖遠佐運功臣金紫光祿大

夫中書右丞相上柱國追封曹南王仍謚桓毅故光祿
大夫中書左丞相贈協謀佐理功臣太師開府儀同三
司上柱國曹國公謚武定阿婁罕加贈竭誠宣力定遠
佐運功臣太師開府儀同三司上柱國追封曹南王改
謚忠宣曾祖母塔本祖母默呼母托端庫庫倫皆先封
曹國夫人改封曹南王夫人制下有勅國史臣集其以
曹南王世家行事歲月著文於其神道之碑臣集受詔
謹按博綽本蒙古扎拉台氏太祖皇帝初起朔方豪傑

之士雲起響應而從之為之腹心爪牙者必皆有深智
遠識有勇而善謀是以東征西伐無不如志以成萬世
之業者天為之生材而聖神善用之故也博綽自其幼
年已在宿衛為和爾齊和爾齊者服御弓矢常侍左右
者也又為博囉齊博囉齊者親烹飪以奉上飲食者也
蓋非篤慎強敏見知而親信任使者不得預是以屬車
所向無不在行數以徇戰掠地著功受賞太宗皇帝即
位仍以其職從征行隴北陝西之役攻城壁取郡縣率

先戰士竟死之伊埒根繼為和爾齊博囉齊膺其父之
職也以太宗之命事伊勒吉太子為番衛之長歲乙未
庫克楚胡土克圖太子出師伐金遂侵宋有旨出從戰
戰有功拜萬戶方是時察罕以太祖所拔重臣為大將
位望崇甚而伊埒根以天下馬步禁軍都元帥為察罕
之副總領諸翼蒙古漢軍馬統領屯戍大軍南面之征
最為重兵矣於是取陝西掠河東踐河南歲乙卯擣光
壽大帥察罕歿憲宗皇帝命伊埒根代之拜諸翼軍馬

都元帥統大軍攻淮東西諸城歲戊午帥師至揚州數
出戰遂以戰死阿婁罕以諸翼蒙古軍馬都元帥統其父
之軍從世祖皇帝南伐宋憲宗崩世祖北還即皇帝位
從至伊瑀巴延布拉克之地阿哩克布克阿勒達爾琿
塔罕興兵為亂不受詔命討之阿婁罕以其所部蒙古
軍擊之北至實默圖之地遂追之至河西功成而還中統
建元之歲賞功賜黃金五十兩達爾丹衣九襲達爾丹者
西域織文之最貴者也二年濟南帥李璫以山東反大發

兵討之阿婁罕總其衆次老倉口以進戰明年濟南破
瑄誅山東平師還又明年賞功賜黃金虎符一銀印一
弓一矢百弓矢之服黃金飾其具馬鞍轡一黃金塗銀
飾其具以舊官將其軍至元初大軍伐宋五年師圍襄
樊力戰數有功論賞賜白金五十兩金織文衣九襲十
一年取宋大軍渡江阿婁罕以其師取鄂州沂江陵下
至荊口所至郡縣降其軍慰撫其民人明年拜昭毅大
將軍統其師發建康道溧水溧陽指獨松關抵杭州上

方道與宋將吳某等戰斬之斬首七千級又與宋將祝
亮戰擒亮并其裨校七十二人斬首三千餘級又與宋
兵戰斬首七千餘級又斬逐其援兵退走數十里宋將
奉使吳某都統丁某總制趙某來逆戰敗之斬首三千
級擒總制谷某又擒宋將張八其裨校斬首二千級六
月即軍中拜中奉大夫行中書省參知政事是年宋亡
明年已延丞相以宋主入覲九月阿朶罕帥師東渡浙
取越明溫台衢婺處及閩中諸郡追宋宗室秀王某道

數戰皆敗之降其運使趙某提刑趙某五百餘人至福州與宋軍轉戰四十餘里斬步帥觀察使李世達等於陣殲其軍獲秀王及其家屬將吏百八十餘人降其部曲淮卒三千人於是江南悉平十二月有詔以中奉大夫中書參知政事授金虎符行江東宣慰使郡縣新附民心未安威信所孚莫不悅服十四年入覲上嘉其功慰勞甚厚進拜資善大夫中書左丞仍還宣慰江東十六年六月進拜資德大夫中書右丞仍留宣慰江東十

八年入覲方是時海內悉已平定舟車所至莫不服從而日本叢爾海島之間彌固自保有司以致討為言天子從之迺賜玉帶一金鞍一弓一矢百弓矢之服具命為中書左丞相行省事統蒙古諸翼軍馬四十餘萬往征之師次明州且渡海矣歿焉既歿而子伊蘓岱爾幼拜姓伊蘓岱爾之兄也襲世職為萬戶總其軍後以功僉書江淮行樞密院事進拜江浙行省右丞福建行省右丞河南行省平章政事仍領其先世萬戶軍馬既歿

伊蘓岱爾以元貞元年世其職授昭勇大將軍左手蒙古軍萬戶佩金虎符武宗皇帝在位思勲舊將帥之家求其子孫之有功有能者故於伊蘓岱爾有加賚焉命玉工刻白玉為伊蘓岱爾所署字使以畫文書發號令於所部使知其為上所尊信者皇慶改元賜白銀五十兩金織文衣二襲延祐三年覃恩加昭毅大將軍至治改元賜白金五十兩金織文衣二襲泰定三年進昭武大將軍皆以萬戶總其軍如故後二年今上皇帝南還

京師將有大正於天下道過汴梁今太保巴延公方鎮

汴省八月庚子召伊蘓岱爾帥其兵以行乙巳兵大集
士卒感激赴義車馬器械精備勇氣自倍丁未命為本
省參知政事賜黃金五十兩玉帶一鎖鉄鑲刀一師行
庚戌進為本省平章政事仍兼山東河北蒙古軍都萬
戶府都萬戶賜銀印一金三珠虎符一黃金五十兩白
金倍之玉帶一海東青鶻一至真定賜名馬二至新樂
驛賜黃金五十兩甲一襲至慶都賜碼碯盤杆一綉青

絨袍一九月庚申為同知樞密院事仍兼都萬戶賜寶
飾鑲鉄槓一鑲鉄寶刀一壬申皇帝即位大明殿建元
天厯明日拜知樞密院事授以樞密院印仍領其萬戶
事甲戌圖們岱爾自遼東引兵寇通州賜寶劔弓矢鞍
轡令伊蘓岱爾帥諸翼軍馬出禦之丙子王禪等之兵
軍於北皇后店伊蘓岱爾移兵合擊敗之己卯哈喇齊
琿塔特穆爾阿喇特穆爾之兵軍於昌平縣東白浮村
帥師合擊敗之壬午錫保齊大都之兵軍於昌平縣東

北又帥師合擊敗之凡來寇之兵悉已敗衄總兵者或
執或敗走北面悉平癸未太師右丞相會諸將於龍虎
臺下奏凱於朝有勅命伊蘓岱爾守居庸之北關壘石
以為固十月己亥拜榮祿大夫知樞密院事依前兼管
都府事統領諸翼蒙古軍馬使出師禦寇兵之西入者
師次廣平磁州之武安縣敗獲總兵者額森特穆爾等
而西南諸郡以次告平庚子召還辛丑賜白金五十兩
中統鈔五千貫金織文衣二襲十一月丁亥樞密院奉

勅散諸軍行院官還京師明年二月以舊官復拜山東
河北蒙古軍都萬戶府都萬戶三月賜以濟蕪宴服濟
蘇者貴臣見饗於天子則服之今所賜絳衣也貫大珠
以飾其肩背膺間首服亦如之副以納赤思衣等七襲
納赤思者縷皮傅金為織文者也海東青鶻二五月上
之上都伊蕪岱爾仍帥其所統兵從八月賜白金五十
兩金織文衣一襲十月癸卯皇帝若曰伊蕪岱爾屬索
韃以備干城恪恭職事朕用嘉之其以為河南行中書

省平章政事代奇珠移奇珠他鎮十一月丙寅以所統
兵置大都督府命兼山東河北蒙古軍大都督秩從二
品刻銀印賜之已已有封贈之命嗚呼上之所以待功
臣將帥寵錫榮耀不亦盛乎臣嘗聞之自昔國家所貴
有勲舊之臣者以其君臣之契深宗社之事諗逆順向
背之道素定於見聞而愛敬之誠自有不能已者故其得
備戎行氣決志憤以能成功也世祖皇帝既定海內以
蒙古一軍留鎮河上與民雜耕橫亘中原故將委忠信

於國人備非常於他日其所以為子孫計者深且遠矣
今上皇帝以天縱之資歷造昧之久奮名義以致討夙
逆應天人而歸履大位固歷數之所在也若曹南王家
自開基以來已入備禁衛出死行陣者三世矣今平章
以其世守之舊兵奉中興之大業以致真王之封食所
居之邑聲振大藩受軍民之寄福祿方未艾也嗚呼偉
哉敢再拜稽首而為之銘詩曰

昔在太祖受命自天聖子神孫師武用宣世祖赫赫一是

萬國帝臣孔多貴有世績忠定之興承國肇基廼執干戈
廼奉鼎彝不寧方來先後奔走盡瘁殞身以昌厥後有竭
桓毅益信以崇帝討王誅無往不從金氣既衰宋亦就蹙
兼弱攻昧我帥我督截彼淮浦其流湯湯蹀血以終厲我
國殤克繼父祖忠宣之武天錫之功世皇是輔肅肅南征
絕江擣城左肅振旅馳追不庭世皇御天於鑠如日式圍
不遺聲教廼訖於時出師有專有分江漢之間忠宣所軍
蒙衝載兵溯江薄海列郡風靡有順無悔旋指江東進師

合攻關柵兒嬉孰當吾鋒斬將連營覆卒盈野廼會元
戎於城之下變變孱嫠解璽入朝掠其餘疆曾不崇朝
既定甌越成功來告命以相臣持節東道治以歲成位
以序升入覲天子龍光是承天子曰嘻蠢彼海裔爾相
予佐帥士以濟臨涯揚舲海若弭靈天不憖遺亟殞將
星忠宣所統國人之勇留戍羅絡齊魯梁宋旗鼓閒閒
我帳在中既世其官又世其功今我聖皇中興以正錫
鑒在塗萬騎前乘誰其將之不二之臣彼壘於郊摧之

為塵聖皇賞功寶玉鷹馬還長其鎮為國召虎頌頌爾
軍何以表之爾建大府都督之旗爾家于曹有桑有土
昔公今王三世之祐豐碑烈功備書三王咨爾多士勸
忠勿忘

高昌王世勲之碑

至順二年九月某日某甲子皇帝若曰予有世臣特穆
爾布哈自其先舉全國以歸我太祖皇帝實贊興運勲
在盟府名著屬籍世繼令德以勵相我國家至特穆爾

布哈佐朕理天下為丞相為御史大夫文武忠孝厥績

懋焉昔其父葬永昌大夫往上塚其伐石樹碑而命國

史著文而刻焉臣某頓首受詔退而考諸高昌王世家

蓋輝和爾之地有和林山二水出焉曰圖固勒曰蘓嚕

克一夕有天光降於樹在兩河之間國人即而候之樹

生癭若人妊身然自是光恒見者越九月又十日而癭

裂得嬰兒五收養之其最穉者則曰布克罕既壯遂能

有其民人土田而為之君長傳三十餘君是為伊嚕勒德

濟數與唐人相攻戰久之乃議和親以息民而罷兵於是唐以金蓮公主妻德濟之子格呼勒德濟居和林博哩博哩特言婦所居山也又有山曰騰格哩哈達台言天靈山也南有石山曰和哩達噶言福山也唐使與相地者至其國曰和林之盛強以有此山盍壞其山以弱之乃告諸德濟曰既為婚姻將有求於爾其與之乎福山之石於上國無所用而唐人願見遂與之石大不能動唐人使烈而焚之沃以醇酢碎石而輦去國中鳥獸為

之悲號後七日伊嚕勒德濟薨自是國多災異民弗安居傳位者數亡乃遷居交州今和卓也統伯什巴哩之地北至阿珠河南接酒泉東至鄂端哈實哈西臨西蕃凡居是者百七十餘載而我太祖皇帝龍飛於朔漠當是時已特瑪阿勒坦德濟伊都呼在位伊都呼者其國王號也知天命之有歸舉國入朝太祖嘉之妻以公主曰伊埒阿敦待以子道列諸第五與哲伯諾延征哈瑪爾蘇爾坦回回等國將部曲萬人以先啓行紀律嚴明

所向克捷又從太祖征尼沙布爾征河西皆有大功薨
次子伊魯格勒齊德濟嗣為伊都呼伊魯格勒齊德濟
薨子茂瑪勒德濟嗣為伊都呼將特摩齊軍萬人從憲
宗皇帝伐宋合州攻釣魚山有功還軍和卓薨至元三
年世祖皇帝命其子和濟格爾德濟嗣為伊都呼海都
特們德爾之亂輝和爾之民遭難解散於是有旨命伊
都呼收而撫之其民人在宗王近戚之境者悉遣還其
部始克安輯十二年都勒幹布思必等率兵十二萬圍

和卓揚言曰阿濟克鄂羅齊諸王以三十萬之衆猶不能抗我而自潰爾敢以孤城嬰吾鋒乎伊都呼曰吾聞忠臣不事二主且吾生以此城為家死以此城為墓終不能爾從城受圍六月不解都勒幹系矢以書射城中曰我亦太祖皇帝諸孫何以不歸我且爾祖尚主矣爾能以女歸我我則休兵不能則亟攻爾其民相與言曰城中食且盡力已困都勒幹攻不止則淪胥而亡伊都呼曰吾豈惜一女而不以救民命乎然吾終不能與之

相面也以其女伊埒伊克默色必吉厚載以茵引繩墜諸城下而與之都勒幹解去其後入朝上嘉其功錫以重賞妻以公主曰巴克已噶爾定宗皇帝之女也又賜寶鈔十二萬錠以賑其民還鎮和卓屯於南哈密勒之地兵力尚寡北方軍猝至大戰力盡遂死之子努爾德濟方幼詣闕請兵北征以復父讐上壯其志賜金幣鉅萬妻以公主曰布爾罕太宗皇帝之孫女也主薨又尚其妹曰本布徹爾公主有旨師出河西俟與北征大軍

齊發遂留永昌焉會吐蕃圖沙瑪作亂詔以榮祿大夫平
章政事領本部特摩齊等軍萬人鎮吐蕃宣慰司威德明
信賊用斂迹其民以安武宗皇帝召還嗣為伊都呼賜之
金印復署其部押西護司之官仁宗皇帝始稽故實封為
高昌王別以金印賜之設王傳之官其玉印行諸內郡伊
都呼之印則行諸輝和爾之境本布徹爾公主薨尚主曰烏
爾戩阿南達安西王之女也領兵和卓復立輝和爾城池
延祐五年十一月廿一日薨子二人長曰特穆爾布哈次

曰恰克嘉皆本布徹爾公主出也特穆爾布哈大德中尚公主曰多爾濟斯滿庫騰太子孫女也至大中從父入備宿衛又事皇太后於東朝拜中奉大夫大都護陞資善大夫又以資善出為鞏昌等處都總帥達嚕噶齊奔父喪於永昌請以王爵讓其叔父欽察台不允嗣為伊都呼高昌王至治中與納木達實王同領甘肅諸軍且治其部泰定中召還與科綽布哈戚順王瑪努勒宣靖王庫庫布哈靖安王分鎮襄陽尋拜開府儀同三司湖廣行省平章政

事今上皇帝歸正大統名之至汴以左丞相留鎮湖廣
時左轄相媚而害政人所弗堪至是有旨執而僇之乃
更為申救於上曰是誠有罪然不至死再三言之得釋
其不念舊惡以德量贊襄類如此天厯元年十月拜開
府儀同三司上柱國錄軍國重事知樞密院事明年正
月以舊官勲封拜中書左丞相三月加太子詹事十月
拜御史大夫大夫之拜左相也追念先王之遺意讓其
弟恰克嘉嗣為伊都呼高昌王臣惟高昌祖之所自出事

甚神異其子孫相傳數十代至於今克治其土豈偶然哉和濟格爾德濟百戰以從王事捐骨肉以救其民後卒死之其節義卓然如此至其子與孫再世三王盛德之報也大夫世胄貴王清慎自持戶庭之間動中禮法平易以近民正己以肅物仁義之功沛如也及其臨大政決大議憂深思遠而聲容凝重若太山然用能彌綸大經以佐成雍熙之盛所謂社稷之臣也哉表其碑曰世勲為宜敢再拜系以詩曰

維皇太祖建極定邦知幾先徠偉茲高昌列國率賦寶
玉重器稽首受命以表誠至太祖曰嘻天啓爾衷有附
匪䟽以究爾功橐鞬介胄十千維旅以從四征斥廣疆
宇從我王事靡鮮朝夕邦之世臣食其舊邑舊邑高敞
介乎強藩為暴突來虔劉以殘保障扞城我禦我備敵
為弗順我死無貳崇墉言言寇來實繁力殫守堅責我
師昏有齊季女出女紆難義有絕愛皇用咨嘆寇退民
完天子慨之輦帛載金悴斯漑之城郭室家既還既復

庶其寧我皇錫之福于廬于處狂囂掎之矢盡衆殲執
節死之維時賢嗣泣血入告請揚天威以報無道天子
壯之俾軍於西撫爾民人授之鼓鼙有囂西羗弗靖以
撓移節征治旋就馴擾武皇纘武睠爾舊服節旌印綬
仍護其屬乃稽王封在時仁宗旂纛舒舒刻章以庸迺
即永昌幕府斯建將星宵隕亦既即遠宰木陰陰閱歷
歲時顧瞻徘徊邦人之思大夫嗣德克敬以讓三命彌
恭世爵用享珮玉瓊琚靖共以居躬行孝嚴服御不渝

肅肅雖雖有察有容親親尊尊允德允功天子還歸大
義攸正大夫在行民信以定既安既寧治久告成大夫
司憲百度孔明袞裳赤舄進見退息敬于無虞匪泰伊
惕大夫申申明哲以孚噓歆有懷永昌之虛天子有詔
大夫省墓勒文載碑世勲是祚維王孫子永言思之豈
惟子孫百辟其儀之

大崇禧寺碑

昔在我世祖皇帝膺上天之景命承太祖之丕基混一

海宇建立制度條理綱紀一出睿思以為子孫萬世之成法者昭乎若天旋而日行也乃若崇尚佛教營治塔寺亦必弘偉殊勝足以聳神明之瞻者厯數在躬天之所命孰能違之若夫大雄妙覺之尊以其慈威定慧默相潛佑者必有其徵矣是以累聖相承率是而行之也今上皇帝潛邸在金陵時於其暇日登鍾山而觀之見其江山之縈迴樹藝之廣茂民庶之熙洽慨然興嘆以為我祖宗德澤之涵煦以至於斯也問諸邦人父老則

又以為昔有聖僧曰寶公者自梁以來委靈茲山能相
我國家之神化以覆護吾民也水旱疾疫凡有禱焉隨
願輒應於是皇上感焉鍾山之陰有石岩中虛下出流
泉注入功德水乃即岩中作觀音大士像岩前構木棧
虛容瞻禮者既而又以為未足即翫珠峯之北得高爽
之福地規置大剎宮殿樓閣如自天降寶公之塔在峯
上正當其前來茲山者仰而望之如見天宮於林壑之
表然後聖上仁民愛物之心所以屬諸寶公者衆庶莫

不知之相與踴躍而贊歎矣鍾山之舊寺聚銅數萬斤鑄大鐘金既在鎔皇上以碧珠投之及鐘成珠不壞完好堅固宛在藥銑萬目驚覩以為寶公之報貺焉天厯元年九月日臣某入見內殿親詔之曰宜加寶公號曰道林真覺慧感慈應普濟寺曰大崇禧寺汝某其勒文以記之臣某既具述其事而竊思之曰帝王之興也天與之天保之百靈受職符瑞交現此其常也金陵據東南之會山川鬼神翼扶翕張於吾君者蓋凡五年而後

歸正大統皇心之注於斯乎嗚呼累朝佛宇之盛皆臨
御時為民禱崇資用功力有司具焉今崇禎之成實在
試難之日出私財以具事而雄麗若此此固生民之所
以深感乎淵衷而寶公之所以顯著於禎符者也嗚呼
休哉敢再拜稽首而獻銘曰

大江之南鍾山龍盤王氣潛鬱神所保完於皇聖明遵
養時晦靈示奉天竦立以待春殷秋高來遊來遨旗有
交龍載雲在郊顧瞻原隰有稼有穡元元之生聖聖之

澤民亦望之帝子實來不鄙我邦庶無苦災維梁寶公
去之千載善福其民有引弗替皇運勃興寶有慧知奔
走先後克相厥時奕奕祠宮我營我作我報無私爾感
無忤吉金之良燥濕不移萬石在簠闕寶乃發

祥以肅羣眎明珠不灼彰上之賜飛龍在天臨制九圍
皇心徘徊眷茲崇禧崇禧之宇永殿南服天子萬年錫
我民福

集慶路重建太平興國禪寺碑

昔金陵有神僧曰寶誌宋元嘉中居道林寺厯齊至梁
數著靈異天監十三年示寂武帝感其遺言瘞諸鍾山
獨龍之阜帝女永安公主表以浮屠因建寺曰閒善至
宋太平興國中太宗得誌公秘識石中符其國運有神
降其宮親與之語蓋誌公云太宗異之號寶公曰道林
真覺菩薩更名寺曰太平興國賜田以食其人熙寧中
王丞相安石守金陵合諸小刹以附益之寺始大建炎
燬於兵紹興中更作淳熙中又燬隨更作之每更作輒

加宏廣日葺月累至於我國朝而規制之盛極矣至治辛酉匡廬僧守忠應請來主之禪學之士來者日滿其室今上皇帝以泰定乙丑之歲正月來至於是邦而寺適災天意若曰其撤舊而作新之手皇上感焉出金幣以為民先是行御史臺與郡縣之吏皆祇若上意始忠之治寺也時有蒲蘆之澤前見奪於豪家寺隸訟之累年弗決忠至讓而弗辨奪者愧而歸之人固以是信道之矣皇上一風動之遠邇雲集富者効其財貧者輸

其力工則致其巧農則獻其食一歲垣廡成再歲堂室具其可以名書者曰方丈曰北山閣曰經樓曰香積曰水陸堂曰白蓮堂曰伽藍堂曰大僧堂曰道林堂曰新倉院曰耆宿之舍而大佛殿鐘樓三門未成蓋有待也歲在戊辰鑄大鐘為金數萬斤方在冶上施寶珠投液中鐘成其款有曰皇帝萬歲珠宛然在其上若故識之而光彩明發不以灼毀萬目共覩歡歎如一時上方別建佛祠於寺北今賜名曰大宗禧萬壽寺者也是年秋

皇帝歸膺大寶是為天曆元年出詔書布德澤於天下
即命廷臣製寶公號曰道林真覺惠感慈應普濟聖師
封名曰以禮祠之出黃金白金重幣以賜忠俾成寺之
役蠲寺田之賦賜守忠為佛海普印曇芳禪師住持大
崇禧萬壽寺兼領茲寺未幾加授太中大夫以大禪寺
領兩寺如故至順元年秋御史中丞趙世安傳勅召忠
入朝九月九日上御奎章閣三藏國師吏部尚書王某
以守忠入見奏對稱旨命大禧宗禪院日給廩餼賜金

欄伽黎衣與青鼠之裘其弟子以教紹基等凡九人賜各有差十二月一日賜設於聖恩寺乃詔學士臣某至榻前製文以記之俾忠歸刻諸石國師以其事示臣某如此臣謹具載而言曰上於金陵新作之事二曰龍翔集慶因潛龍之舊邸也曰崇禧萬壽廣親構之新祠也獨太平興國雖曰宋齊梁陳唐宋之遺然盡燬而復興實在今上龍飛之日景運之玄契蓋有徵焉茲三寺者鼎立乎一郡之間以同贊乎聖天子億萬斯年之壽豈

不盛哉然臣嘗竊聞陛下之意每不欲專福於躬而欲溥濟均惠於天下故敢述萬一而銘之銘曰

維帝受命厥有禎符天人合機不占以孚於赫聖皇聖武之系贊於克艱神作司契皇有萬方山川幅員釐厥下土徒御告勤顧瞻道林在江之汜翠蓋孔旌來狩來止道林有宮百靈攸宗中有神師民所敬恭土良泉甘風雨時若發祥效珍以待聖作聖作孔時動而天隨龍躍以飛神師啓之神師不言而示以兆有命方新去故以

燎作而新之自我聖皇乃祓乃除乃基乃堂日月重明
天光旁燭皇心載欣萬佛降福凡我臣民息養以生飽
歌煖嬉稚壯耄寧裹兵以革牛馬在野至於永久樂其
休暇蠕動孳殖亦遂以成幽塞苦冤各甞而亨聖皇之
心斯佛之力銘以著之以示無極

道園學古錄卷二十四